



Hapo zamani za kale, kulikuwa na mwanamme aliyeitwa Biantaka. Alikuwa na ng'ombe. Kila siku Biantaka alimlisha ng'ombe wake na kumpa maji. Alikuwa na chungu kidogo alichotumia kuchota maji.



Siku moja, Biantaka alimwendea jirani yake kumuomba chungu kikubwa ili akitumie kuchota maji. Jirani yake alikubali kumwazima Biantaka chungu kikubwa. Alisema, "Tatizo la jirani yangu ni tatizo langu."

Siku chache baadaye, Biantaka alienda kwa mfinyanzi akanunua chungu kidogo. Alipofika nyumbani, alikiweka ndani ya kile chungu kikubwa alichomuomba jirani yake.





Alijitwika chungu kikubwa kilichokuwa na kile kidogo ndani yake. Akaenda moja kwa moja hadi kwa jirani yake aliyemwazima.



Biantaka alimwambia,
“Nimekurejeshea
chungu chako
ambacho kimezaa
kingine.” Jirani
alishangaa kwamba
chungu chake kilikuwa
kimezaa chungu
kingine. Alimpongeza
Biantaka akisema,
“Umebarikiwa sana.”



Baada ya muda,
Biantaka alirudi kwa
jirani yake kumuomba
chungu tena. Mara hii,
kakuwa na nia nzuri.



Mwenye chungu alimsubiri Biantaka arejeshe chungu chake bila mafanikio. Mwishowe, alikwenda nyumbani kwa Biantaka akasema, "Nimekuja kukichukuwa chungu changu."



Biantaka alimwambia jirani yake, "Rafiki yangu, chungu chetu kilifariki. Nilikusudia kuja kukuletea ujumbe huo mbaya."



Kwa mshangao, Jirani aliruka juu. Uso wake ulianza kufura kwa hasira. Alipiga kelele akimkemea Biantaka, "Sijawahi kusikia kuwa chungu kinafariki!"



Biantaka alimjibu,
“Rafiki yangu, lazima
uyakubali mambo
haya. Kila kitu
kinachozaa lazima pia
kifariki. Mimi pia
nilihuzunika sana
kufuatia kifo cha
chungu chako
kikubwa.”



Jirani alifoka kwa hasira akaenda kortini kumshtaki Biantaka. Hakimu alisikiliza maelezo ya pande zote mbili. Aliamua kuwa jirani mwenye chungu ndiye aliyekuwa na makosa.



Hakimu alimwuliza,
“Biantaka
alipokwambia kuwa
chungu chako kilizaa,
ulikubali. Kwa hivyo
unapaswa kukubali
anaposema kwamba
kila kiumbe hai
kinachozaa lazima
kifariki kwa kuwa
anasema ukweli.”
Hivyo ndivyo hakimu
alivyoamua kesi hiyo.



Jirani alitembea polepole kama konokono akarudi nyumbani. Alikuwa amekipoteza chungu chake kikubwa. Naye Biantaka alikuwa amekipata chungu kikubwa kwa kutumia ujanja wake.

